

DISSERTATIONEM PHILOSOPHICO-
MEDICAM,
DE
**VERMIUM GENESI
IN CORPORE
HUMANO,**

P R Æ S I D E

V I R O

Nobilissimo, Experientissimo Clarissimoq̃

D O M I N O

**LUDOLPHO HENRICO
RUNGIO,**

M. D. ejusd. Fac. & Philos. Theor. Profess. Publ.

Ord. Reip. Br. Physico,

Præceptore omni honoris cultu ætatem
prosequendo,

Publicè Ventilandam suscipiet

AUCTOR

DIDERICUS WOHLDT,

Bremâ-Saxo,

Ad diem Saturni IX. Septembris MDCCXIX.

H. S.

B R E M Æ,

Typis HERMANI BRAUERI, Illustris Gymnasii Typogr.

DEO,
PATRIÆ,
PARENTIBUS,
COGNATIS,
PATRONIS

ATque

AMICIS.

*Hanc Dissertationem sacram
facit*

AUTHOR.



DISSERTATIO. PHILOSOPHICO-
MEDICA.

DE. VERMIUM. GENESI.
IN. CORPORE. HU-
MANO.

§. I.

VOx vermis ut de eo ducamus initium, variam agnoscit originem, hanc enim alii à vere lata nimis derivatione deducunt, quod omnia tunc emicent vermium genera. Jonston. de insectis lib. 3. c. I. eam mavult deducere à Græco *ἐρπω* quod repere significat. Isidorus hoc animalculorum genus ideò vermen dici, quod verrat seu ad partes oppositas se trahat, contendit. Alii autem meæ sententiæ propius accedentes, commodiori sensu eandem à vertendo derivant, quatenus omnium verminum speciebus, illud commune esse videmus.

§. II.

Vermes autem in genere vix aliter definiri possunt,
A sunt,

sunt, quam quod sint infecta reptilia. Differunt longè plurimum ratione tum magnitudinis, tum coloris, tum figuræ, & quam maxime ratione loci vel patriæ, in qua degunt, ita dantur Vermes Arborarii, fruticarii, leguminarii, frumentarii, herbarii, terrestres, animales & tandem humani. De singulis hisce speciebus agere haud est præsentis instituti, cum de ultimis tantummodo videlicet qui generantur in corpore humano differere decreverim.

§. III.

Si jam Medicorum observationes pathologicas consulamus, diversa reperiuntur in corpore humano vermium genera, dantur enim vermes in capite, qui atrocem sæpius causantes cephalalgiam encephalici dicuntur, horum numerantur quatuor genera, quorum aliqui in cerebro nascuntur, quidam in naso à Borello nificolæ dicti, aliquando in auribus teste Kerkringio Observat. Anatom. 19. non nunquam in ipsa dentium radice. Imò vero cum neque oculi, neque exteriora capitis velamenta, ab his prorsus sint immunita quidni & plures vermium cephalicorum recenseri possent species. Vermes in pulmonibus dari observatione expertissimi Fernelii constat. Caspar. Bauhinus in jecore infantis duorum annorum multos reperit vermiculos. Schenkius lib. 2. observ. med. vermes in pericardio se invenisse testatur. De vermibus in sanguine contentis Rioli in enchirid. Anat. p. 147. & Borellus cent. 3. observ. 4. scripsere. In renibus sæpe inveniuntur vermes, uti idemet observavi in rene canis

nis, sub ductu Clarissimi atque Experientissimi Domini Præsidis, Præceptoris mei fidelissimi atque Fautoris ætatem colendi, ubi reperimus duos vermes, longitudine ulnæ spatium superantes & latitudine minimi digiti crassitiem adæquantes.

§. IV.

Et sic ferè nulla pars corporis adest in qua non vermis suum habitaculum inveniatur. Ita nuperrimis adhuc diebus in hujus civitatis Nosocomium recipiebatur homo quinquagenarius ulceribus crurum cacoëthicis laborans, in quibus numerosa illorum proles se offerebat spectanda, ideò tamen vel quamvis humorum cacochymiam à vermibus derivare prout Langius contendit in pathologia sua verminosa minime nobis probabile videtur.

§. V.

At præcipuè reperiuntur in intestinis, & hæc in specie sunt de quibus in præsentierit nostra disputatio. Horum autem plerumque dantur tria genera, aliqui sunt rotundi, oblongi, tereles, & dicuntur lumbrici & inveniuntur in intestinis tenuibus. Secundi generis dicuntur cucurbitini, à semine cucurbitæ sic dicti, vocantur etiam teniæ quia sæpe stupendæ observantur magnitudinis, nempe 14 vel 15 vel 16 pedum, apud Platerum 40. Tulp. observ. med. Lib. 2. cap. 42. refert hujus lumbrici lati ulnas quadraginta, bidui curriculo, fuisse excretas. Plinius libr. XI. H. N. Cap. 33 tradit

tænias pedum 30 & plurium magnitudinem adæquasse, hi per tota intestina quandoque extenduntur, quibus arctissime cohærent. Tertiï generis sunt ascari- des admodum exigui & præprimis in intestino recto & rugis ani reperiuntur.

§. VI.

Horum igitur in corpore nostro productio, ut nobis tanto facilius & melius innotescat necessarium esse duximus, in generalem vermium genesin inquirere. Producentur autem vermes secundum veteres Aristotelicos ex putredine, hi enim statuebant duplicem esse generationem, vel similem, vel dissimilem, vel ut alii loquuntur univocam & æquivocam, similem vocabant, quando animal sui simile generabat, ut equus equum, Dissimilem quando animal, etiam res inanimata corpus heterogeneum producit, uti sol murem, corpus putrescens vermem. Licet ipse Aristoteles de generat. lib. I. cap. 16. certa quædam insecta vermes generare affirmet, nihilominus ejus sequaces, qui hujus magistri sui effati ignari, in vermium generatione ad solam provocant putredinem, ex humidi nimia abundantia cum calido juncta exortam: Verum qui novit putredinis naturam nunquam asseverabit eam ad productionem animalium aptam esse natam, corpus enim cum ideo computrescat quod motu intestino ejus partes continuo agitentur, extra situm vertantur atque immutentur, ita ut tandem pristina mixti forma pereat, nemo non intelligit quamcunque partium dissociationem, mixturam, vel novum co- alitum aliaque inde nata, ad nullam normam esse exacta.

§. VII.

§. VII.

Quomodo verò fortuita talis & inordinata mixtura animal possit producere cujus partes tam admirabili ordine sunt dispositæ, vix puto quempiam fore qui illud sana ratione demonstrari posse existimet. Quinimo si hæc eorum argumentatio esset vera, quare non novum vermium genus indies producitur? quod tamen stante hac opinione necessario fieri deberet.

§. VIII.

Hoc igitur sensu scholasticorum generationem æquivocam merum esse figmentum audacter asseveramus, quod mihi facile concessum iri confido si ostendero, certo experimento demonstrari posse non minus vermes quam reliqua animantia e semine parentum generari, adeoque suæ speciei non vero putredinis esse prolem. Hoc autem experimentum sagaci ingenio ac laudabili industria Clariss. Rhedi adornavit sequentem in modum.

§. IX.

Sumsit nempe vitrum minoris capacitatis, carnes in illud indidit, & densissimo velo obduxit, hoc vitrum in aliud majoris capacitatis inclusit, hocque rursus velo rariori clausit, toto apparatu calori expposito, plures muscas odore carniū allectas eò avolare animadvertit. Quid factum, in altero sc. densiori velo paulo post reperit multos vermiculos, qui nisi quis illos emisisset, in vas ipsum penetrassent.

§. X.

§. X.

Magno autem conatu laborant ut eò versus deveniant, id quod idem observavit Rhedi, vermes enim posteaquam primum velum feliciter trajecerant & jam in secundo, quo orificium vasis quod carnes continebat occludebatur, hærent, tanto nisu id egisse, ut jam dimidia parte corporis velum illud secundum pertransierint & parum abfuerit, quin carnibus illis sese explevissent.

§. XI.

Sed audio scholasticum triumphum agentem, cum hoc experimento generatio æquivoca magis adstruatur quam destruat, ex musca enim prodit vermis, animal parenti dissimile; At sciat ante victoriam, quia talis vermis non est animal à musca diversæ speciei, sed pullus ejusdem, qui per congruum nutrimentum justam maturitatem adeptus in similem excrescit muscam per coitum simillimo procreando vermiculo idoneam.

§. XII.

Quæritur ergo cur insectorum pulli figura externa à parentibus adeò discrepent? Hoc ut ritè innoscatur considerandum hæc animalcula dum ex ovo prodeunt tenerrimæ esse constitutionis, membra obtinere molliuscula, vix ullo impetui externo sustinendo paria, si igitur nuda ex ovo excluderentur, verendum esset ne vel à solo aëris externi rudiori contactu ita mutaren-

tarentur eorum partes minus firmiter cohærentes, ut omnibus certè ideo esset pereundum, verum ut sagax natura in necessariis vel etiam minimis nunquam deficit, ita tenerrima hæc animalcula non nuda, sed folliculo vestita & defensa ex ovulo prodire voluit, ut hæc sc. ratione à præcoci interitu defenderentur: Tali itaque peplo involuta, ut vermis non verò animalis alati speciem præseferant necesse est.

§. XIII.

Hac autem pellicula suspensa satis manu & convenienti dexteritate remota, in conspectum prodit animalculum, quod nobis satis distinctè ostendit singulas partes & singula membra nulla ratione diversa, (si magnitudinem, colorem, & soliditatem excipias,) à membris istius animalis in quod postmodum de integro transformari creditur. Uti Joh. Swammerdammius in hist. de insect. gener. Cap. 2. disertis nobis ostendit verbis.

§. XIV.

Nolim interim negare vermes dari neque ab insecto alato procreatos neque in tale mutandos, sed è verme natos, qualis forte est lumbricus terrestris, à sola vero putredine productos absolute nego.

§. XV.

His jam præmissis rei ordo postulat, ut vermium generationem in corpore humano mox perscrutemur. Quos sequenti modo in corpore nostro produci posse ratio-

rationi videtur consentaneum. Perpendamus modo infinita papilionum, muscarum, culicum, similiumque insectorum oviparorum genera in aëre volitare quorum non nulla tantæ sunt exilitatis ut non nisi accuratissimis possint conspici microscopiis.

§. XVI.

Consideremus hæc animalcula mira gaudere virtute speciem suam propagandi & multiplicandi, ita Hornius observavit unicam apem fœmellam annuo spatio sex millia ovulorum exclusisse, ipsemet vidi præterito mense julio erucas jam in papiliones versas, glutine quodam lanuginoso abductas eoque arboribus ac lignis affixas innumerabilem ovulorum jam exclusorum hoc suo incubatu fovisse, ita Rhedi experimentum ostendit numerosam prolem à muscis haud magno temporis intervallo procreatam, imo stupenda illa ac nobis molesta adeo muscarum copia quam observamus quando caletur maximè, uberrimam harum multiplicationem sufficienter manifestat.

§. XVII.

Porro animo pervolvamus minutissimorum insectorum ovula adeò esse parva ut à levissima aëris commotione abripiantur ac propellantur de loco in locum, majorum vero uti muscarum, ut plurimum deponi in esculentis & potulentis ut idem demonstrat experimentum Rhedianum: quinimo in quam plurimis concretis præsertim liquidis tantam exiguorum animalculorum copiam detegit microscopium, ut nonnulli

Philo-

Philosophi non dubitarint omnem saporem ex morfu illorum deducere.

§. XVIII.

His inquam rite perpensis, nulla amplius hæret difficultas quomodo insectorum semina intra corpus nostrum hauriantur; ita ova volatilia cum aëre adducta, & humori salivali irretita, cum eodem sæpius demittuntur ad ventriculum, ita muscarum vel grandiorum quoque insectorum ovula cum esculentis & potulentis uti sunt fructus horræi, carnes, lacticinia, saccharata, mellita, corpori nostro ingeruntur.

§. XIX.

Si jam in ventriculo & intestinis offendant mucum à quo ceu convenienti habitaculo possint excipi, sique calor vitalis fovendis hisce ovulis exacte fuerit proportionatus, & nisi interim ab alia quadam causa destruantur, tractu temporis vermes excluduntur, his conditionibus ita perseverantibus vermes jam nati ad majorem minoremve excrescunt magnitudinem, prout nutrimentum receperint magis minusve congruum.

§. XX.

Ast objici nobis posset si hæc sententia nostra esset vera, necessario inde sequi, quod in omnibus hominibus debeant nasci & dicto modo incrementum capere. Verum cum validior ventriculi digestio, hæc ovula facile destruere possit, præterea certus caloris

B

gradus

gradus requiratur ad illos excludendos, prout anserum incubitū ova gallinae excludi nequeunt. Unde apparet quod calor iusto minor plane non perficit, majorem perdere: & porro cum unus homo vescatur cibis quibus alter non utitur, unde sæpius evenit quod certa assumpta vermibus non solum ineptum suppeditent nutrimentum, verum eosdem plane destruant. Cum igitur milleni dentur homines, quibus felix adeo contigit ventriculi & intestinorum dispositio, ut eorum motus ac calor vitalis longè plus valeat ad destruenda quam fovenda hæc animalcula quorumque victus vermibus prorsus est contrarius, non mirum si hi omnes à vermibus degant immunes, unde apparet superioris argumenti vim facile posse everti.

§. XXI.

Sic homines videmus è contrariò, qui per totum vitæ tempus his affliguntur, quia calor eorum ad vermium generationem aptus est, motus vitalis debilior, assumpta vermibus amica, quæ cum ob dictas conditiones in viscidam facile mutantur putrilaginem, hinc animam ut plurimum habent olidam & excrementa foetida.

§. XXII.

Cum igitur generatio vermium ex ovulis sufficienter hucusque demonstrata sit, non incongruum erit, ut de diversis vermium generibus in intestinis pauca addamus. Sunt nonnulli qui omnem vermium varietatem, ex sola nutrimenti diversitate derivare volunt, sed meo quidem iudicio minus bene, cum diver-

diversum alimentum magnitudinem quidem, sed non speciem animalis mutare possit; ergo si verum est, quod ascarides cum lumbrico terete sint ejusdem speciei, rationi non repugnat illos in lumbricos mutari posse, dummodo aptius & uberius recipiant nutrimentum.

§. XXIII.

Verum non sola magnitudine, sed revera specie differre vermes in corpore humano, vel solus testatur cucurbitinus, si comparetur cum lumbrico terete, ita dantur alii ad serpentem, alii ad erucam, alii ad aliud reptile figurâ accedentes, uti videre possumus in tabulis æneis Nicolai Andry tractatui de vermibus, præfixis.

§. XXIV.

Illud igitur hic tantum consideremus non unius, sed diversorum insectorum ovula sæpius hauriri intra corpus nostrum, unde evidens est, si papilionis ovulum fuerit deglutitum non posse inde talem nasci vermem, qualis nasceretur ex ovulo muscæ & ex hujus, alium rursus quam ex culicis: Ita memini me quondam vivos vermes vomitu excretos vidisse, qui externa figura erucæ erant simillimi, neque dubito hosce vermes ex ejusdem generis parentibus fuisse natos ac eruca. Quid ergo mirum diversos adeo vermes subinde nasci in corpore humano.

§. XXV.

Cum autem vix aliter contingat, quin unus

idemque homo diversissimorum insectorum semina hauriat, mirum sane videtur, cur hic uno certoque sæpius vermium genere, alius rursus alio laboret. Ita unus continuo scatet lumbrico tereti, alter ascaridibus, tertius tæniis, alius aliis, quandoque tamen hisce simul. Ad quam rem multum facere puto, quod hic vel ille calorem potius ad hujus quam illius speciei ovula excludenda habeat proportionatum, prout in gallinis videmus, qui certo tantummodo caloris gradu pullos producere queunt.

§. XXVI.

Præterea victus ratio huc plurimum quoque confert, prout hic diætam agit excarnem, alius iisdem quotidie sese replet, alii usu ciborum horariorum, lacticiniorum similiumque magis delectantur. Quodvis igitur vermium genus cum eodem victu pariter non utatur, verosimile videtur, pro diversitate nutrimenti diversas nutriri in hoc præ isto subjecto vermium species.

§. XXVII.

Imo verò licet iisdem utantur esculentis & potulentis diversi homines, propter differentem tamen digerendi modum, in singulis poterit elaborari peculiaris conditionis chylus, huic vermium speciei congruus, alii incongruus, non aliter ac videmus ob soli diversam indolem, in hac terra, vegetabilia quædam lætiùs excrescere, in alia eadem extinguì.

§. XXVIII.

§. XXVIII.

Quæritur autem, qui vermiculi isti ad tantam imò omnem fidem superantem magnitudinem, uti exemplo lumbrici lati constat, sæpius excrescant. Quod non aliunde commodè deduci potest, quam à nutrimento eorundem lautiori quod vasa ipsorum nimis laxa, præter morem replendo ac proinde extendendo efficit, ut sensim ac sensim ad tantam excrescant magnitudinem. Insuper considerandum dum hæc animalcula convenienti humore & calore continuo foveantur, vascula eorum magis ac magis emolli, ita ut nutrimento appellenti longè promptius & facilius cedant, ac si degerent in loco quodam magis frigido & sicco.

§. XXIX.

Sicut vero insecta excludunt ovula & ex ovo excluditur vermis, ita vermis mutatur rursus in insectum parenti simillimum, uti nobis præter superius laudatum Swammerdamium, Virorum Doctissimorum ac toto orbe Celeberrimorum, Spigellii, Rhedi, Malpighii sedula patefecit industria. Hoc igitur cum adeo sit certum ut jure illud nemo negare audeat, mira res videtur, cur vermis ex. gr. ex muscæ ovo natus in corpore humano nunquam mutetur in muscam, sed semper sub forma vermis excrescat.

§. XXX.

Quæ res, ut verum fatear, primo intuitu datam jam hypothesein non parum mihi suspectam reddere vide-

videbatur, ita ut ferè crediderim vermes non insectorum alatorum esse prolem, sed sui generis animalcula. Verum re accuratius ruminata, facile intelligebam, si insectorum vermiculi non nimis lauto sed modico fruerentur alimento, neque in loco nimis humido degerent, canaliculos ad pelliculam exteriorem nutrimentum deferentes, hujus nec non sufficientis humiditatis defectu exarescere atque adeò succo alibili recipiendo & transmittendo ineptos reddi, hoc igitur illa destituta, ut emoriatur necesse est, hinc abscedendo liberum facit excrescendi locum istis membris putata alis ac pedibus, quæ hætenus immediate texerat, his jam cum reliquo corpore adolescentibus, qui hucusque vermis fuit in perfectum suæ speciei animal mutatur.

§. XXXI.

E contrariò hi vermiculi in loco fati humido & moderatè calido constituti, si copiosissimum ipsisque convenientissimum ac proinde lautissimum receperint nutrimentum, tubuli ad folliculum externum tendentes, nutrimento recipiendo non solum servantur apti, verum illud uberrima copia continuo admittunt, quamdiu ergò nutritur, tamdiu quoque cum animalculo quod concludit, excrescit, ac proinde vero simile videtur, membra quæ immediate dicto folliculo subjacent, tractu temporis ab hoc comprimi, suffocari, recipiendoque ulteriori nutrimento prorsus inepta reddi, hancque veram rationem esse putamus, cur memorato modo vermis sensim majorem molem occupando, non in perfectum sui generis animal, alis &

& pedibus instructum mutetur, sed reptilis ad insignem magnitudinem excreti formam retineat.

§. XXXII.

Si jam quis quærat, qui contingat ut vermes producantur etiam in remotissimis corporis nostri partibus ex. gr. rene, pericardio, cerebro &c. Respondemus, ex superioribus jam constare animalcula insecta dari longè minutissima, ita ut sine microscopiis conspici vix possint. Credibile est igitur eorum ovula tantæ esse exilitatis ut hausta & versus intestinâ de-
milla cum chylo transeant vasa lactea & sic tandem ad M. S. pertingentia, cum eadem devolvi possint ad quasvis corporis nostri partes extremas ibidemque propelli in vasis alicujus arteriosi ramum lateralem, & ex hoc denique deponi vel in quodam viscere, vel etiam in extremo quodam corporis articulo: eo autem in loco, si adæquatum offendat calorem excluditur, animalque exclusum idoneum nutrimentum inveni-
ens paulatim incrementum capit.

§. XXXIII.

Illud verò magis arduum videtur, qui nempe vermes in ventriculo & intestinis fœtus in utero adhuc degentis generentur, quod ex eo constat, quod sæpius statim post partum insignis etiam magnitudinis cum meconio excernantur, uti præter Virorum Doctissimorum observationes, quotidiana testatur experientia. Quidam igitur hac in re se omnes difficultates

tes superasse credunt, si cum Hippocrate pronuncient vermes in utero materno cum homine generari, atque huic rei ut aliquam veri speciem concilient, perhibent in prima creationis origine cum primo homine vermes simul esse productos, & ex hujus hominis semine, eosdem in posteros esse propagatos, & ita tandem totum genus humanum hujus semini verminosi particeps esse factum, adeoque quemvis hominem ab ipsa nativitate vermium semine esse imprægnatum, ob justum tamen caloris & nutrimenti defectum, in pluribus hominibus ex dicto semine vermes non produci.

§. XXXIV.

At vero quis tanto figmento assentiri mallet? Quis crederet ex semine humano aliud quid quam hominem gigni? Si enim ex semine humano producerentur, credibile esset vermes homini adeo esse naturales, ut sine discrimine in quovis etiam subjecto læte excrescerent, quod tamen quotidianæ refragatur experientiæ. Cum igitur modo longè probabiliori à nobis ostendi possit via, per quam ad fœtum in utero perveniant vermes, haud mirum videatur ulli, si fabula hæc minus nobis arrideat.

§. XXXV.


Ex §. XXXII. igitur repetamus, minutissima insectorum ovula ad quasvis corporis partes devolvi posse, unde liquet, si ad uterum pertingant in muliere gravida, quod ex hujus vasis expedita ipsis pateat
via

via ad uteri placentam, & hinc inde per vasa umbilicalia ad ipsum foetus corpus, intra quod recepta, lege circulationis cum sanguine propelli poterunt ad quasvis corporis partes, horum itaque unum vel alterum, si ex ultimis arteriis ingrediatur excretorium quoddam sive gastricum, sive intestinale ex eoque sese devolvat vel in ventriculum, vel intestina, ibidemque requisito caloris gradu foveatur, ut ex eo (eodem ritu, ut in superioribus in natorum intestinis contingere exhibuimus) vermiculus excludatur necesse est. Cum autem foetus liquorem amnii, lacti aquoso haud absimilem subinde ore resorbeat, exinde vermiculo idoneum nutrimentum suppeditari posse putamus, ita ut in hoc non minus quam in adulto incrementum feliciter capere possit, ac proinde non mirum, si puerulos statim post partum vermes excrevisse observatum fuerit.

§. XXXVI.

Possimus quidem plura addere de morbis & symptomatibus variis à vermibus productis, simulque eorundem signa, Prognosin ac curam indicare. Verum hæc quidem pro hac vice dicta sufficiant. Soli igitur ac sapienti creaturarum Creatori sit Laus, Honos & Gloria in sempiterna Secula.

FINIS.



ANNEXA.

I.

DE omnibus non est dubitandum.

II.

Dari fulmina dura & cuneiformia Neg.

III.

Inter liquidum & humidum magna est differentia.

IV.


Non dantur Medicamenta universalia.

V.

Ventriculus non semper est causa malæ concoctionis.

VI.

Plantæ sola aqua non nutriuntur.



WOHLDTI dilectos inter fors prima so-
dales

Pars desiderii maxima pœne mei,
Ardua dum tractas dum profers ardua dex-
trè

Indolis eximiæ das nova signa tuæ.
Macte tuis donis forti quin macte labore
Sic tua transibit fama per ora virum.
Scandite virtutis celeri pede nescia mortis
Culmina subvectus Bellerophontis e-
quo.

Sic exantlatis studiis laudemque decusque
Optato nactus fœnore dona petis.

*Paucis hisce amico suo paucis
unico gratulari
voluit*

Hermannus Slichtingh,

Med. Stud.

S Du willst/wehrter Freund / uns schon früh-
zeitig lehren/

Wie aus den Eiern stets die Würmer sich vermehren.

Du zeigest Deinen Fleiß/den Du erworben hast/

Durch Deine grosse Müh/ und durch viel Sorg und Last.

Drum fahre ferner fort / wie Du hast angefangen/

So wirst Du Ruhm und Preiß durch Deinen Fleiß erlangen/

Der Musen ganzes Heer wird geben Dir den Lohn/

Und setzen auf Dein Haupt die schöne Lorbeer-Krohn.

Diese geringe Zeilen hat dem
Herrn Authori übers-
schicken wollen

S. H. H. S.

Ὁ φεύγων μύλην ἀλφιτον ἐκ ἀλφει.

Illud nequaquam tibi posse latere videtur,
Ut præsens specimen satque superque
probat,

Sci-

Scilicet ut dulcem caperes sapidamque fa-
rinam

Æquum duxisti non fugitare molam.
Nunc igitur restat mea gaudia tester Amico,
Pagina quod præsens hæcce *minuta fa-*
cit :

Te verò venerande rogo Moderator Olym-
pi,

Ut tua continuo gratia fervet eum.

L. Mque

Henricus Carolus Borch,

Ph. & Med. St.



Urit mature, quot vult urtica manere.

Quid nostri nobis velint præsentē notari
Effato Proavi, nulli puto posse latere;
Hinc quæ præclarus de se speranda relin-
quat

WOHLDTIUS, insignis primoque in flore
juventæ

Edita sat præsens hæc dissertatio monstrat.

Fas igitur, fausto successu læter amici

Pro-

Promamque haud fictos hilari de pectore
 plausus,
 Vosque precor, SUPERI, cœptis, precor
 Astra favete;
 Ut capiat meritæ sic tandem præmia Pal-
 mæ.

*Amico suo estimatissimo
applausit ita*

Joh. Bernh. Feltrup,
Med. St.

